



Fundasaun Mahein (FM), 9 Outubru 2023

Komunikadu Imprensa

Pareser ba Komisaun B Parlamentu Nasional kona-ba Prioridade sira ba Setor Defeza, Seguransa no Negósiu Estranjeiru iha Proposta Lei OJE 2024

Setor defeza nasional nian, ba tinan 2024 FM hakarak propõem atividade sira ne'ebé ami konsidera estratéjiku tebes no tuir ami nia observaun haree katak sei bele dudu dezvoltamentu setor defeza. Liu-liu reeve no atualiza Estudu Estratéjiku Forsa-2020 no defini fali planu ba dezvoltamentu no konsolidasaun ba Forsa Armada no dokumentu estruturante sira ba Planeamentu Estratéjiku Defeza no Militar. Hosi política temi liu daudauk ne'e hodi hasa'e mos kbi'it Komponente Naval F-FDTL nian ba iha defeza, vijilânsia, kontrolu no fiskalizaun ba atividade marítima no portuária iha âmbito Sistema Autoridade Marítima Timor-Leste. Liu-liu vijilânsia no kontrolu iha parte tasi-mane Timor-Leste nian hodi prevene atividade ilegal sira hanesan peska ilegal. Tuir relatóriu hosi Ministériu Agrikultura no Peska kada tinan Timor-Leste lakon mais-menos US\$ 300 milloens hosi atividade peska ilegal. FM mos sujere ba Ministériu Defeza kontinua fó treinamentu no hadi'a kapasidade Forsa Armada atu fó apoiu ba populasaun sivil, liu-liu iha tempu dezastre naturais no kazu emerjênsia sira seluk iha âmbito sistema integradu seguransa nasional nian.

Setor seguransa interna nian FM sujere avalia, reeve no atualiza Planu Estratéjiku Seguransa Interna (PESI) 2030, atu nune'e bele ajusta ho dezafiu atual ka ohin-loron nian, iha setor seguransa interna no protesau sivil. Iha tinan 2024 aleinde revizaun ba PESI 2030, ami mos sujere Ministériu Interior tau mos prioridade ba elaborasaun ba Política Seguransa Nasional ne'ebé lolos halo ona iha Faze I no II implementasaun PESI 2030. Iha tinan 2024 Governu presiza kontinua tau prioridade ba Estudu Estratéjiku ba PNTL hanesan temi ona iha PESI 2030. Iha elaborasaun estudu ne'e nian Polísia Komunitária tenke sai nafain filozofia no estratéjia polisiamentu PNTL nian no kaer metin nafain doutrina VIP (vizibilidade, Involvimentu no profesionalismu).

Servisu inteligênsia nian ligadu ho dezafiu ohin loron, liu-liu iha espasu sibernétiku nian tenke investe mos iha inteligênsia sibernética, liu-liu iha mundu globalizadu ohin loron iha ne'ebé sistema hotu-hotu inklui governasaun nian sai dijitalizadu. Ho nune'e, importante ba entidade seguransa liu-liu servisu inteligênsia presiza adapta-an ho realidade mundu dijitalizadu ida ne'e. Liu-tan ho planu *cabo submarino* ne'ebé sei mai presiza mos kondisaun seguransa ba infraestrutura vital refere.

Tuir FM nian monitorizasaun tempu to'o ona ba Governu atu altera *Lei Organização Investigação Criminal* (LOIC) no reforsa fila-fali PNTL iha área investigasaun kriminal. Tamba prezensa LOIC aumenta fragilidade institucional no la valoriza instituisaun PNTL ne'ebé existe desde Timor-Leste hetan independênsia. FM preokupa LOIC bele hamosu-tan tensaun no konflitu entre instituisaun Estadu rua ne'e. Ho ida ne'e, FM apoiu programa Governu nian kona-ba reforma no kapasita PCIC ne'ebé ba oin sei tutela hosi Komandu PNTL, ho objetivu atu hametin ninia kapasidade ba asoens kona-ba prevensaun, detesaun, investigasaun no investe iha laboratóriu no ekipamentu sientífiku no kriminais no reforsa formasaun iha área investigasaun kriminal PNTL nian.

Ikus liu, polítika externa Timor-Leste tinan 20 ona to'o agora seidauk elabora dokumentu ne'e, nune'e iha tinan 2024 FM sujere ba MNEC tau prioridade ba elaborasaun, produsaun no aprovasaun ba Livru Mutin Polítika Externa). Nune'e mos número timor-oan servisu iha rai liur kontinua aumenta ba bebeik, tamba ne'e protesaun ba traballador timor-oan sira iha rai liur tenke sai prioridade bo'ot no presiza haforsa regra no servisu diplomátiku Timor-Leste nian iha rai liur hodi fó protesaun ba sira bainhira sira presiza no hanesan direitu ida ne'ebé garantia hosi Estadu.

Rekomendasaun

FM rekomenda ba Komisaun B Parlamentu Nasional no IX Governu Konstitusional iha tinan 2024 tau prioridade ba asuntu estratéjiku sira iha setor defeza, seguransa no negósiu estranjeiru hanesan elaborasaun, produsaun no aprovasaun ba:

1. Polítika Seguransa Nasional;
2. Polítika Defeza Nasional;
3. Livro Mutin Polítika Externa;
4. Planu Estratéjiku Seguransa Interna
5. Estudu Estratéjiku PNTL.

Parlamentu Nasional halo alterasaun ba LOIC no reforma no kapasita PCIC ne'ebé ba oin sei tutela hosi Komandu PNTL, ho objetivu atu hametin ninia kapasidade ba asoens kona-ba prevensaun, detesaun no investigasaun, investe iha laboratóriu no ekipamentu sientífiku no kriminais no reforsa formasaun iha área investigasaun kriminal PNTL nian.

Nune'e mos servisu patrullamentu no informasaun PNTL hodi identifika no prevene hahalok sira ne'ebé potênsia mosu krime. Ikus liu, reforsa servisu intelijênsia, liu-liu rekolla, analiza informasaun no promove intelijênsia sibernetika iha Sistema Nasional Intelijênsia.

Atu hetan informasaun kle'an halo favor kontaktu:

Fundasaun Mahein

Email: mahein2009@gmail.com

Telemovel: (+670) 75771766

Website: www.fundasaunmahein.org